

- 25 (108) Ich bin ouch ein recke und solde kröne tragen.  
 ich wil daz gerne füegen, daz si von mir sagen,  
 daz ich habe von rehte liute unde lant.  
 dar umbe sol min ère und ouch min houbet wesen phant.
- 26 (109) Nu<sup>1)</sup> ir sit sô küene, als mir ist geseit,  
 nune ruoche ich, ist ez ieman liep oder leit,  
 ich wil an iu ertwingen, swaz ir muget hân,  
 lant unde bürge, daz sol mir werden undertân.“
- 27 (110) Den künic hete wunder, und sine man alsam,  
 umbe solhiu mære, als er hie vernam,  
 daz er des hete willen, er næme im siniu lant.  
 daz hörten sine degne; dô wart in zürnen bekant.
- 28 (111) „Wie het ich daz verdienet,“ sprach Gunther der degene,  
 „des min vater lange mit èren hât gepflegen,  
 daz wir daz solden vliessen von iemans überkraft?  
 wir liezen übel schinen, daz wir ouch pflegen ritterschaft.“
- 29 (112) „Ich ne wils<sup>2)</sup> niht erwinden,“ sprach der küene man.  
 „ez enmüge<sup>3)</sup> von dinen ellen din lant den fride hân,  
 ich wils alles walten; und ouch diu erbe min,  
 erwirbest du s' mit sterke, diu sulen dir undertænec sîn.
- 30 (113) Din erbe und ouch daz mine sulen geliche ligen.  
 sweder unser einer am anderen mac gesigen,  
 dem sol ez allez dienen, diu liute und ouch diu lant.“  
 daz widerredet' Hagne dô unde Gêrnôt sâ zehant.
- 31 (114) „Wir hân des niht gedingen,“ sprach dô Gêrnôt,  
 „daz wir iht lande ertwingen, daz iemen drumbe tôt  
 gelige vor heldes handen. wir haben richiu lant;  
 diu dient uns ze rehte, ze niemen sint si baz bewant.“
- 32 (115) Mit grimmege muote stuonden dá die friunde sîn.  
 dô was ouch dar under von Metzen Ortwin;  
 der sprach: „disiu suone ist mir harte leit.  
 iu hât der starke Sifrit unverdient widerseit.
- 33 (116) Ob ir und iwer bruoder hetet niht die wer,  
 und ob er danne hête ein ganzec küneges her,  
 ich trûte<sup>4)</sup> wol erstriten, daz der küene man  
 dise starke übermüete von wâren schulden müese lân.“
- 34 (117) Daz zurnde harte sêre der helt von Niderlant;  
 er sprach: „sich sol vermezzen niht wider mich din hant.  
 ich bin ein künic riche, sô bistu küneges man;  
 jan dorften mich din zwelve mit strite nimmer bestân.“
- 35 (118) Nâch swerten rief dô sêre von Mezen Ortwin;  
 er mohte Hagnen swestersun von Tronje vil wol sîn;

<sup>1)</sup> da nun. — <sup>2)</sup> = wil es; es abb. von erwinden. — <sup>3)</sup> falls dein Land nicht von deiner Kraft Schutz erhalten kann. — <sup>4)</sup> Prät. von triuwen, trouwen.